

Այս թափառումների շարժառիթը յաճախ միայն կրօնական չէ. նրանք գնում են աշխարհ տեսնելու, իրանց հայրենիքի հետ մօտիկից ծանօթանալու եւ իրանց սրբազան տաճարները նայելու նպատակով, քանի որ տաճարները միեւնոյն ժամանակ գեղարւեստի ու հազւագիւտ իրերի թանգարաններ են ներկայացնում:

Նրանք նոյնպէս շատ են սիրում ուխտ գնալ բարձր սարերը, մանաւանդ իրանց սիրած սրբազան Ֆուջի, ուր բարձրացողների թիւը 10-15 հազարի է հասնում ամեն տարի: Այդ Ֆուջին մի մասնաւոր սէր ու յարգանք է վայելում եւ զարմանալի նման է մեր Փոքր Մասիսին:



Հասաւ ժողովրդական Մատսուրի կոչւած տօնի օրը:

Թմբուկի անընդհատ զարկը վաղ առաւօտից ոչ ոքի հանգիստ չէր տալիս:

Ես իջայ քաղաք իմ հաւատարիմ ջին Չիւդաի հետ: Բոլոր տների պատերը բաց էին, եւ այնտեղ, ինչպէս օթեակներում, բազմած էին գեղեցիկ ճապոնուհիները: Յանկարծ դէպի ինձ վազեց եւրոպական տարազով զուգւած մի ճապոնացի երիտասարդ եւ առաջարկեց ինձ անգլիերէն, որ երթանք իր մի ծանօթի տունը, որի առջեւից անցնելու էր թափօրը:

Նախ ուզում էի հրաժարւել, այնքան անսպասելի էր այդ առաջարկը, բայց իմ Չիւդաի յանդիմանող հայեացքը զգացրեց ինձ, որ ես իզուր էի անվստահութեամբ վերաբերւում այդպիսի սիրալիր ու պարզ հիւրասիրութեանը: Ես յօժարեցի, ու մենք միասին առաջ շարժեցինք խիտ բազմութիւնը ճեղքելով, մինչեւ որ երիտասարդը կանգ առաւ մի փոքրիկ տնակի առաջ: